

新修長蘆鹽法志

第十九冊

附編

援證一

優恤

援證二

律令

援證三

場竈

援證四

轉運

長蘆鹽法志附編

援證

徵文必資考古。鹽法惟重遵今。蓋今之法皆本

聖朝所釐訂。所為因地制宜。隨時通變。參於古而不泥於古。折衷於盡美盡善者也。舊志沿革互見。如必曰若為沿。若為革。不拘且瑣乎。茲特以現行之事例為斷。凡列代鹽筴之同異。亦彙輯之。以存是非得失之林。斯亦流覽者所不廢也。志援證

援證一

歷代優恤

漢書地節四年詔朕惟百姓不贍遣使者巡行郡國問民所疾苦吏或營私煩擾不顧厥咎朕甚憫之今年郡國頻被水災已賑貸鹽民之食而價咸貴衆庶重困其減天下鹽價

漢書本紀元帝元初元年詔江海陂湖園池屬少府者以假貧民勿租賦

漢書本傳使平當行流民於幽州舉奏吏二千石勞徠有意者言渤海鹽地可且勿禁以救民急

唐書乾元元年第五琦初變鹽法游民業鹽者為亭戶免雜徭

舊唐書食貨志長慶元年三月鹽鐵使王播奏應管煎鹽戶及鹽商並諸鹽院亭場官吏所由等前後制敕除兩稅外不許差役追擾今請更有違越者縣令刺史貶黜罰俸從之

玉海宋祥符九年十月二十六日丁酉詔曰山澤之禁慮傷厚斂令翰學李迪中丞凌策與三司同議鹽茶制度俾園亭戶無失所商販便興販

長蘆鹽法志 內編 優恤
宋史天聖元年詔凡天下鹽稅取一歲中數為額後雖羨益勿增毋得抑配人戶苛阻商旅○皇祐元年三司使王君貺乞更河北鹽法條畧頗精密仁廟批曰朕不忍河北軍民頓食貴鹽三司即時寢罷後刻詔於北京望宸閣宋史食貨志自皇祐以來屢下詔書命給亭戶官本皆以實錢其售額外鹽者給粟帛衣糧亭戶逋歲課久不能輸者悉蠲之所以存恤之者甚厚

宋史本傳孟元權知滄州民鬻鹽為生歲荒多不售民無以自給元度軍食有餘悉用易鹽繇是民不轉徙

金史食貨志大定十三年十一月張邦基言寶坻鹽課若每石收正課百五十觔慮有風乾折耗遂令石加耗鹽二十二觔半仍先一歲貸支償免以優竈戶

元史食貨志世祖至元十八年以河間竈戶勞苦增工本為中統鈔三貫二十五年增工本為中統鈔五貫○至正三年河間轉運司竈戶被水災詔權免鹽餘二萬引候年豐補還官九年以河間鹽運司水災住煎鹽三萬引

明史食貨志明初仍宋元舊制所以優恤竈戶者甚厚給草場以供樵採堪耕者許開墾仍免其雜役又給工本米

一石置倉於場兼支錢鈔以米價為準尋定鈔數河間引二貫雜犯死罪以上予杖計日煎鹽以贖

山東志永樂十九年詔各處納欠鹽課悉皆蠲免

舊志宣德二年詔自十一月十五日以前遞年拖欠鹽課盡行蠲免

明史食貨志宣德三年北京戶部尚書郭敦言洪武中中鹽客商年久物故代支者多虛冒請按引給鈔十錠帝從之而命倍其鈔

舊志宣德四年詔各運司查勘中鹽客商年遠事故者行

原籍每引給資本鈔二十錠

明會典正統三年令竈戶逃移者鹽課勘實停徵

兩淮嘉靖鹽法志正統四年詔正統二年十二月終以前遞年拖欠戶口鹽糧鹽鈔及虧欠鹽課皆免

明會典正統四年令貧難竈丁戶下該徵稅銀於本州縣存收免令起運

舊志正統五年詔遠年客商中鹽未支者每引給資本鈔二十錠○正統十四年詔自正月以前凡拖欠鹽糧鹽鈔鹽課盡行蠲免明年各處民間該徵戶口鹽糧以十分為

率俱免四分以蘇民困○是年又遣耿九疇以副都御史
 整理兩淮長蘆鹽法賑濟貧竈釐革積弊僉補逃亡○景
 泰元年詔兩淮等運司四川鹽課提舉司正統十三年正
 月以前拖欠鹽課悉皆蠲免○景泰三年詔淮浙等處運
 司四川雲南鹽課提舉司正統十四年正月以前蠲免拖
 欠鹽課客商無支給者所司查勘明白仍照先後挨年以
 次補支

明實錄景泰十二年令竈戶除正役里甲該辦糧草外其
 餘柴夫弓兵皂隸一切雜泛差役丁少者蠲免丁多者亦

量減除

舊志天順元年詔淮浙長蘆山東運司所屬鹽稅課司地
 方近因災傷人民饑窘各該巡鹽御史通行取勘逃亡事
 故竈丁無人頂補遺下未辦自景泰七年五月以前各鹽
 課明白具數奏報除豁以蘇民困○是年復詔淮浙長蘆
 等鹽運司四川等鹽課提舉司景泰七年十二月以前拖
 欠鹽課悉與蠲免原派各商引鹽改派天順元年以前課
 內關支○成化四年詔今後內外官員之家不許占中引
 鹽侵奪商利○成化六年詔各處鹽場有因雨水損壞倉

厥消化鹽鈔曾經風憲官踏看明白者盡行蠲免其有因災傷無力煎辦曾經奏報勘實者該辦鹽課以十分為率減免三分

兩淮嘉靖鹽法志成化十四年詔正統十四年前客商中鹽未支者每引給資本鈔河東長蘆福建山東每引二十錠其景泰元年以後及今告代支放客商行鹽照此例○成化十六年詔永樂宣德正統間客商所中鹽全未支者各造冊送部於原籍有司給資本鈔每引三十錠景泰元年以來未支引鹽願關資本者聽

舊志宏治元年詔商人病故無子父母見在兄弟同居共爨不繫別籍異財妻能守志不願適人孫非乞養過繼保勘明白俱準代支妻若改嫁仍追還官其伯叔妾姪並在堂出嫁之女遠族異爨之人俱不許代支如有朦朧告發問擬如律○是年又詔商人有支鹽出倉打引出場行至中途或已到家病故者查勘無礙每鹽一引著令納米一斗賑濟貧竈準其代掣

鹽政志宏治二年令各處竈戶犯徒罪以上審有力並干礙鹽法囚犯徒杖以上準納米贖罪者俱發所在場倉照

罪上納米穀及入官船隻頭畜貨物亦變賣價銀送發該場以備凶年賑濟貧竈

舊志宏治五年詔宏治元年十二月以前各處鹽運司提舉司拖欠鹽課悉與除豁若有被水消折曾經風憲官勘實及折罰鹽糧年久追徵未完或客商失落截角退引並皆免追○是年又詔竈戶煎辦辛苦有司不許科派雜泛差徭○宏治十八年詔各處鹽運司提舉司鹽課司自宏治十六年十二月以前客商失截角退引皆免追○是年又詔各處鹽運司提舉司鹽課司自宏治十六年十二月

以前拖欠未完並風雨消折鹽課及折色鹽課銀布等項詔書到日風憲官覈勘是實悉與除豁以蘇竈丁貧苦

鹽法志正德五年詔各處商人先年報中糧草已納在官未給鹽引者照數給與見鹽未納者悉皆釋放追賠

舊志正德五年詔兩淮兩浙長蘆四川各鹽運司近年查追拖欠遠年鹽課將竈丁逼迫逃竄或有淹禁致死者除已經開中有引照舊煎辦給商及存積在官聽候中賣外其餘自正德四年以前未經開中額數拖欠或存積年久風雨消折等項巡按御史勘實一體蠲免遇有納剩餘鹽

或小民自行煎辦鹽餉不多者仍照舊例許令本處貿易不在興販私鹽之例

明實錄正德五年赦各處軍衛有司鹽課等項歷年拖欠者悉皆停免待豐收年歲每年帶徵一分

舊志正德十二年詔各年風雨消折等項殘鹽已有旨準賣外今後一應商人勢要人等俱不許違例奏討以致阻壞鹽法有悞邊儲違者定行拏問重治○正德十三年詔令各運司提舉司但繫濱海竈戶應辦額鹽及應納囚鹽俱收本色給商不許折收價銀及各商買補違者聽巡鹽

御史嚴處

鹽法志嘉靖九年定每鹽引以五百五十觔為則內另酬商鹽五十觔

舊志嘉靖十五年詔各處鹽場有因雨水損壞倉廩消化鹽課曾經撫按官奏報勘實者並免追賠

兩淮嘉靖鹽法志嘉靖二十年詔內外倉場官攢斗級及糧戶人等有虧折糧草及各處鹽場官吏及竈戶人等虧損鹽餉監追年久者除侵盜虛出等項照舊監追外其有挹爛損折失火延燒並因雨水損壞倉廩消化鹽課者撫

按官勘實悉免追賠

舊志隆慶四年御史蘇士潤奏豁歲徵長蘆竈戶鈔貫三百餘兩

明史萬歷十年詔天下各鹽運司鹽課司提舉司萬歷八年以前額課拖欠並存積年久風雨消折巡鹽御史勘實盡行蠲免○萬歷二十九年詔各直省軍民逋負戶口食鹽米鈔諸色課程鹽課魚課等項自萬歷二十年以前已徵在官已經解戶人等收受者截數起解已經起解者嚴併批關不許風聞中止未徵在官繫小民拖欠者分別蠲

免

長蘆鹽法志附編

援證二

歷代律令

史記平準書漢大農上鹽鐵丞孔僅咸陽言敢私鑄鐵器

煮鹽者鈇左趾沒入其器物

韋昭曰鈇以鐵為著左趾以代刑也張裴漢晉律序云狀

如跟衣著足足下重六筋以代刑

唐書食貨志貞元中盜鬻鹽一石者死至元和中減死流

天德五城皇甫鐸奏論死如初一斗以上杖背沒其車驢

能捕斗鹽者賞千錢節度觀察使以判官州以司錄錄事

參軍察私鹽漏一石以上。罰課料。鬻鹽者坊市居邸主人。市僧皆論坐。盜刮鹽土一斗。比鹽一升。州縣團保相察。比於貞元加酷矣。

舊唐書穆質傳。元和初。掌賦使院。多擅禁繫戶人。而有笞掠至死者。質乃論奏。鹽鐵轉運司。應決私鹽繫囚。須與州府長吏監決。自是刑名畫一。

唐書食貨志。開成末。詔私鹽月再犯者。易縣令。罰刺史俸。十犯則罰觀察判官課料。宣宗即位。茶鹽之法益密。糶鹽少私糶多者。謫觀察判官。不計十犯。

五代會要。後唐長興四年五月七日。諸道鹽鐵轉運使奏。諸道州府鹽法條流。元末一槩定奪。一應食末鹽地界。州府縣鎮。並有椎糶場院。久來內外禁法。即未一概條流。應刮鹹煎鹽。不計多少。劬兩。並處極法。兼許四隣及諸色人等陳告。等第支給賞錢。欲指揮。此後犯一兩以上。至一劬。買賣人各杖六十。一劬以上。至二劬。各杖七十二。二劬以上。至三劬。各徒一年。三劬以上。至五劬。各徒二年。五劬以上。買賣人各決脊杖二十處。死。如是收到鹹土鹽水。即委本處煎煉鹽數。準條科斷。或有已曾違犯。不至死刑。經斷後。

公然不懼條流再犯者不計勛兩多少並處極法其有權糶場院員寮節級人力煎鹽池客竈戶般鹽船綱押綱軍將衙官捐工等俱知鹽法如有公然偷盜官鹽或將貨買其買賣人及窩盤主人知情不告並依前項刮鹹例五勛以上處死○顆末青白等鹽元不許界參雜如有違犯一勛一兩並處極法所有隨行物色除鹽外一半納官一半與捉事人充賞○一應諸道今後若捉獲犯私鹽麴人罪犯分明正該條法便仰斷遣訖奏若稍涉疑誤祇須申奏取裁

舊五代史食貨志後周廣順元年九月詔改鹽法凡犯五勛以上者處死煎鹹鹽犯一勛以上者處死先是漢法不計勛兩多少並處極刑至是始革之

五代會要廣順二年九月十八日敕條流禁私鹽麴法一諸色犯鹽麴所犯一勛以下至一兩杖八十配役五勛以下一勛以上徒三年配役五勛以上並決重杖一頓處死一應所犯鹽麴關津門司廂巡門保有透漏並行勘斷一刮鹹煎煉私鹽所犯一勛以下徒三年配役一勛以上並決重杖一頓處死犯私鹽若捉到鹹水抵煎成鹽秤盤定

罪逐處凡有鹹鹵之地所有官吏節級所由常須巡檢村坊隣保遞相覺察若有所犯處彰露並行勘斷一所犯私鹽捉事告事人各支賞錢以係省錢充至死刑者賞錢五十千不及死刑者三十千一顆末鹽各有界分若將本地分鹽侵越疆界同諸犯鹽例科斷一鄉村人戶所請蠶鹽祇得將歸襄繭供食不得別將博易貨賣報託與人如違並同諸色犯鹽例科斷所請蠶鹽道路津濟須經過州府縣鎮委三司明行指揮一凡買鹽麩並須於官場務內買若衷私報託興販並同諸色鹽麩例一諸官場官務如有

羨餘出剩鹽麩並許盡底報官如衷私貨賣者並同諸色鹽麩科斷若鹽鋪及諸色人與場院衷私貨賣者同罪科斷一所犯私鹽麩有同情共犯者骨肉卑幼奴婢同犯祇罪家長主首不知情祇罪造意者餘減等科斷若是他人同犯據逐人脚下所犯觔兩依輕重斷遣一州城縣鎮郭下人戶係屋稅合請鹽者州府並於城內請給州縣鎮郭下人戶亦許將鹽歸家供食仰本縣預取逐戶合請鹽數目攢定文帳部領人戶請拔勒本處官吏及所在場務同點檢入城若縣鎮郭下人戶城外別有莊田亦仰本縣預

先分擘開坐勿令一處分給供使。○廣順三年十二月敕諸州府並外縣鎮城內其居人屋稅鹽今後不俵其鹽錢亦不徵納所有鄉村人戶合請蠶鹽所在州城縣鎮嚴切檢校不得放入城門。

舊五代史食貨志顯德元年十二月上謂侍臣曰朕覽食末鹽州郡犯私鹽多於顆鹽界分蓋卑濕之地易為刮鹹煎造豈惟違我榷法兼又汙我好鹽况末鹽煎煉般運費用倍於顆鹽今宜分割十餘州令食顆鹽不惟輦運力兼且少人犯禁。○顯德三年十月敕漳河以北州府界元是

官場糶鹽今後除城郭草市內仍舊禁法其鄉村並許鹽貨通商逐處有鹹鹵之地一任人戶煎煉興販則不得踰越漳河入不通商地界。

宋史本傳趙滋知安肅軍保州會契丹民遣大舟十餘自海口運鹽入界河朝廷患之以滋可徙知雄州滋戒巡兵舟至輒捕其人殺之輦其舟移文還涿州契丹因使人以為言朝廷更以為能。

宋史食貨志宋自削平諸國天下鹽利皆歸縣官官鬻通商隨州郡所宜然亦變革不常而尤重私販之禁五代時

鹽法太峻建隆二年始定官鹽闌入法禁地貿易至十觔
 鬻鹹鹽至三觔者乃坐死民所受蠶鹽以入城市三十觔
 以上者上請三年增闌入至三十觔鬻鹽至十五觔坐死
 蠶鹽入城市百觔以上奏裁自乾德四年後每詔優寬太
 平興國二年乃詔闌入至二百觔以上鬻鹹及主吏盜販
 至百觔以上蠶鹽入城市五百觔以上並黥面送闕下淳
 化五年改前所犯者正配本州牢城

文獻通考建隆二年以五代時鹽法太峻始定官鹽闌入
 禁法貿易至十觔煮鹹至三觔乃坐死民所受蠶鹽以入

城市三十觔以上徒三年增闌入三十觔煮鹽至十觔坐
 死蠶鹽入城市百觔以上奏裁自後每詔優寬至太平興
 國二年乃詔闌入至二百觔以上煮鹹及主吏盜販至百
 觔以上蠶鹽入城市五百觔以上並黥面送闕下

慶元條法事類淳熙元年三月敕令後販賣私鹽捕獲到
 官之人若罪合科徒流者當官相驗身貌強壯及得等杖
 堪充征役免罪刺填軍額身貌怯小疾病不堪役使即依
 本法施行○諸私有鹽一兩笞四十二觔加一等二十觔
 徒一年二百觔加一等三百觔配本戍煎煉者一兩比二兩以通商

界鹽入禁地者減一等三百觔流三千里其人戶賣鹽
 兵級賣食鹽以官鹽入別縣界去本州縣遠於就近州縣
 一觔答二十觔加一等二百觔加一等罪止徒三年
 金史食貨志世宗大定三年定軍私煮鹽及盜官鹽之法
 ○大定三年十一月定軍民犯私鹽者皆令屬鹽司三百
 里外者則付提點所若逮問犯人而所屬怯不遣者徒二
 年○大定二十八年五月叛巡捕使取鹽使司弓手充巡
 捕人且禁不得於人家搜索若食鹽一斗以下不得究治
 惟盜販私煮則捕之○大定二十八年十二月定禁司縣

擅科鹽制○大定二十九年十月章宗朝隆慶宮諭有司
 曰比因獵知百姓多有鹽禁獲罪者民何以堪朕欲令依
 平灤太原均辦例令民自煎其令百官議之十二月戶部
 尚書鄧儼等謂若令民計口定課民既輸乾辦錢又必別
 市而食是重費民財而徒增煎販者之利也且今之鹽價
 蓋昔日錢幣易得之時所定今日與向不同况太平日久
 戶口蕃息食鹽歲課宜有羨增而反無之何哉緣官估高
 貧民利私鹽之賤致虧官課爾近已減寶坻山東滄鹽價
 觔為三十八文乞更減去八文歲不過減一百二十餘萬

貫官價既賤所售必多自有羨餘亦不全失所減之數况今府庫金銀約折錢萬萬貫有奇設使鹽課不足亦足補百有餘年之經用若量入為出必無不足之患乞令平灤乾辦鹽課亦宜減價各路巡鹽弓手不得自專巡捕庶革誣罔之弊禮部尚書李晏等曰所乾辦者既非美名又非良法必欲杜絕私煮盜販之弊莫若每觔減為二十五文使公私價同則私將自己又巡鹽兵吏往往挾私鹽以誣人可令與所屬司縣期會方許巡捕違者按察司罪之刑部尚書郭邦傑等則謂平灤瀕海及太原鹵地可依舊乾

辦餘同儼議宰臣奏以每觔官本十文若減作二十五文似為得中巡鹽弓手或減三分之一鹽官出巡須約所屬同往不同獲者不坐上遂命寶坻山東滄鹽每觔減為三十文已發鈔引未支者準新價足之餘從所請○孫即康等同鹽司官議軍民犯私鹽三百里內者鹽司按罪遠者付提點所皆徵捕獲之賞於販造者又濱州渤海縣永和鎮去州遠恐藏盜及私鹽可改為永豐鎮與曹子山村各設巡檢○命山東寶坻滄州三鹽司每春秋遣使督按察司及州縣巡察私鹽

元史世祖本紀至元四年八月嚴平灤私鹽酒醋之禁
元典章至元十一年七月定挈住私鹽給賞應捕軍人挈
住與一十五兩不干礙人挈住二十五兩

元史成宗本紀元貞二年罷民間鹽鐵爐竈○大德八年
私鹽徒役者減一年

元史食貨志延祐六年頒分司印巡行都邑以防私鹽之
弊○至正二年七月河間運司申本司去歲河間等路旱
蝗又因古北口等處把隘官及軍人不為詰捕大都路所
屬有司亦不巡禁致人裝載疋疋鹽於街市賣之明相饋

送今紫荆關捕獲犯人張狡羣等所載疋疋鹽計一千六
百餘觔自至元六年迄今犯者將及百起若不申問恐年
終課不如數本部具呈中書省照會樞密院給降榜文禁
治之○大都河間運司改設巡鹽官一十二員專一巡禁
○河間運司申戶部云本司歲辦額餘鹽共三十六萬引
計課鈔一百一十四萬錠近年各處私鹽及犯界鹽販賣
者衆失於禁治以致侵礙官課乞降詔旨宣諭所司
元史本傳李復亨奏陽武設賣鹽官以佐軍用乞禁滄濱
鹽勿令過河河南食陽武解鹽河北食滄濱鹽南北俱濟

詔尚書省行之

元史刑法志諸犯私鹽者杖七十徒二年產一半沒官於沒物內一半付告人充賞鹽貨犯界者減私鹽罪一等提點官禁治不嚴初犯笞四十再犯杖八十本司官與總管府官一同歸斷三犯開奏定罪如監臨官及竈戶私賣鹽者一體同私鹽法諸偽造鹽引者斬家產付告人充賞失覺察者鄰佑不首告杖一百商賈販鹽到處不呈引發賣及鹽引數外夾帶鹽引不相隨並同私鹽法鹽已賣五日內不赴司縣批納引目杖六十徒一年因而轉用者同賣

私鹽法犯私鹽及犯界斷後發鹽場充鹽夫帶鐐居役役滿放還諸犯私鹽會赦家產未入官者革撥諸私鹽再犯加等斷徒如初犯二犯斷同再犯流遠婦人免徒其博易諸物不論巨細科同罪諸轉買私鹽食用者笞五十七不用斷沒之令諸捕獲私鹽止理見發之家勿聽攀指平民有權貨無犯人以權貨解官無權貨有犯人勿問諸販私鹽被獲拒捕者斷罪流遠省而傷人者處死諸巡鹽軍官輒受財脫放鹽徒者以枉法計贓論罪奪所佩符及所受命罷職不敘○諸鹽場官勘問人致死者從轉運司差官

攝其職發犯人歸有司○諸煎鹽草地輒縱野火延燒者杖八十七

元典章諸鹽場遇有買納及支官鹽無致留難不受不給或勘合號簿批鑿引鈔違限者並徒二年秤盤不平者徒二年如客商買到官鹽並官司網運船經由河道其關津妄行邀阻者陳告得實杖一百因而乞取財物者徒二年官司故縱者與同罪失覺察者笞五十如有遮阻拘買取利者徒二年鹽付本主買價沒官○一應私鹽兩鄰知而不首者罪減犯人一等經過關津軍官不行盤捉一體斷

罪如有通同縱放者與販私鹽人同罪○犯鹽經斷賊徒各於門首粉書大字書寫犯鹽經斷賊徒六字官為籍記姓名責令巡尉捕盜等官每月一次點名撫治務要改過別求生理出入往回須使鄰佑得知三日之外不歸者即報捕盜官究問三年不犯得鄰佑保舉方許出籍○附場百里之內村莊鎮店城郭人戶食用鹽貨官為置局發賣驗各家食鹽月日從運司出給印信憑驗關防無致私鹽生發如是過期却有附餘鹽貨別無由關同私鹽法科斷○煎熬燒草每年常有野火燒延靠損草地及有砍伐柴

薪之人以致失誤用度仰本處鄰接官司委自管民正官專以關防禁治但犯杖八十因而闕用者奏取敕裁○諸客旅並行鋪之家賣訖官鹽限五日內赴所屬州司縣繳納引如違限匿而不批納者同私鹽法仍委提調官置簿關防無致停藏卧引影射私鹽拘到退引當官隨即毀抹每季申解運司收管運司官所至之處先行檢舉不如法者就便究問

明實錄洪武三年十二月中書省臣言民有販賣私鹽者於法當誅請如律上曰彼皆細民恐衣食不足而輕犯法

姑杖之發戍蘭州

明會典凡諸色軍民權豪勢要人等乘坐無引私鹽船隻不伏盤驗者杖一百軍民俱發烟瘴地面充軍有官者依上斷罪罷職○凡將官運鹽貨偷取或將沙土插和抵換者計贓比常盜加一等如或係客商鹽貨以常盜論客商將買到官鹽插和沙土貨賣者杖八十○凡令客商派定場分守支清即打引出場若無見鹽者止許於本場買補若將已完鹽課捏作未完遺留空引侵盜影射私鹽者鹽貨價錢並入官官吏縱容以枉法論○凡起運官鹽並場

戶往來船載上倉將帶軍器者。並行處斬。○凡諸人買私鹽食者。減販私鹽人罪一等。因而販賣者。處絞。○凡各鹽場竈丁人等。除正額鹽外。將煎到餘鹽。夾帶出場。及私鹽貨賣者。絞百夫。長知情縱容。或通貨賣者。同罪。兩鄰知私煎鹽貨不首者。杖一百充軍。

明條例一各邊召商上納糧草。若內外勢要官豪家人。開立詭名。占窩轉賣取利者。俱問發邊外充軍。干礙勢豪。參究治罪。

明會典宣德四年。令往來內官內使官軍人等。夾帶私鹽者。許應捕官軍人等盤挈。○宣德九年。令各處運司。並鹽課司。但有客商夾帶私鹽者。原支引鹽。俱沒入官。○宣德十年。令竈戶犯該徒罪有力者。準納米贖罪。

明實錄正統元年。令各處地方。有首獲私鹽者。鹽入官。以鈔照時值給賞。

明會典正統二年。令各處竈丁有犯。俱免納米。及調場筭杖者的。決雜犯死罪。與徒流罪者。除歲辦額鹽外。令每日煎鹽三觔。死罪準工五年。流罪準工四年。徒五等。各照年限。計日煎鹽贖罪。

明實錄正統二年令販私鹽五千斛以下罪應徒者於獨石納米二十五石贖罪○正統十一年刑部奏販私鹽千斛以上者擺站萬斛以上者充軍俱不必上請其列艦持兵拒捕者仍上請從之

古今齟畧景泰元年戶部奏準令竈丁軍民有犯私鹽並干礙鹽司一應詞訟等事該徒罪者照徒年限該流罪者四年該雜犯死罪者五年調場煎鹽另取戶丁煎辦其本名額鹽軍餘調沿海邊衛守瞭民發江北擺站各滿日疎散寧家著役○景泰二年令各運司提舉司官吏縱容庫

役門子那移作弊及分司官員鹽課司官攢典通同富豪總催釐秤人等詐害客商批驗所監掣官員並官攢作弊害人受贓滿貫者俱發邊衛充軍○景泰二年令各處商客越境貨賣引者不問多寡俱發遼東鐵嶺衛充軍其所
在官司並巡捕巡司官兵人等不行如法緝拏者一體治罪受財縱放者邊衛充軍若應捕人捉獲及諸人告發者量行給賞

明實錄景泰三年六月戶部奏國家邊計專仰於鹽邇歲以來私鹽盛行而興販者多官鹽價輕而中納者少如直

隸揚州地名狼山料角嘴等處路當衝要其土豪糾合勢要持兵挾刀勢如強賊夤夜貿易動以萬計若不禁治恐邊方闕糧召商不願有悞邊備乞移文各處嚴督緝捕但越境貨賣者送官究問發遼東鐵嶺衛充軍妻子隨往有司受賄故縱者亦發邊衛充軍捕獲之人量加給賞從之

維揚志成化十八年令巡捕官員興販私鹽至二千觔以上發邊衛充軍

明會典成化十九年令客商偽造印引詭名貨賣者梟首示衆久住鹽場撥置害人者遞發原籍當差

明實錄宏治元年令各處軍衛舍餘興販私鹽該管官通同縱容者問罪革去見任十二月申嚴官員勢要違例中鹽之禁

舊志宏治十七年都御史王允中上言該漕運衙門題明回空運軍每名夾帶私鹽五十觔者照例盤詰其瓶罐買裝不足五十觔者放行此端一開其弊將不可言今後食鹽旋買旋用不許指以瓶罐有壞鹽法

寧津縣志正德二年御史張智題準鹽法在清本源私鹽之弊私煎為之始今後竈丁聚團煎者不得離場私煮仍

將該地方立保伍連坐之法責令彼此覺察通同者事發俱問罪

舊志正德十二年都御史藍章題奏各場竈丁敢有不在本團私自立竈煎鹽出場者即是私鹽就便拏問照例從

重招結

按明史志傳皆載章巡兩淮鹽不言兼巡長蘆而舊志及山東鹽法志畿輔通志皆載之今仍其舊

明實錄正德十五年令各府州縣囚徒情深罪重者不論遠近俱發本省鹽場缺人鍋下照依年分煎鹽抵辦逃亡竈丁額課

明律嘉靖元年令總鎮等官不許縱容下人倚勢販鹽侵

奪民利阻壞軍餉五年令在外各衛及守禦千戶所巡獲私鹽俱即時連人贓衛則關堂所則解送附近州縣收問贓物變賣價銀彙解運司轉解戶部敢有違限半年之上不即關衛及送有司者不拘有無入已即照巡獲私鹽不解官者律坐罪有能告首就將所獲私鹽贓物與之○凡軍人有犯私鹽本管千百戶有失鈐束者百戶初犯笞五十再犯杖六十三犯杖七十減半給俸千戶初犯笞四十再犯笞五十三犯杖六十減半給俸並附過還職若知情容縱及通同販賣者與犯人同罪

舊志嘉靖四十五年巡鹽御史李文績上言長蘆行鹽地方畿內八府河南二府今鹽之行者惟順天保定大名衛輝彰德五府而其他州縣皆壅滯不通蓋由永平離場甚近多屬私販往來正定順德廣平等處地多鹺鹵居民刮土煎燒私鍋不下四百餘面納官之銀約三百餘兩鉅鹿一縣私鍋計一百餘面稅銀約百有餘兩他若冀州安平饒陽衡水隆平廣宗曲周等處俱習以為常乞委廉幹官員逐一清查如果鹺味厚鍋面多比照南北二所事例附入五場編課仍查利國利民等場中有疲憊不堪者移此

附彼併屬該司一體配搭支掣其地土原額糧米既徵鹽稅相應豁除若鹺味薄而鍋面少則務嚴行禁止之○崇禎三年巡鹽御史喻思恂上言天津為產鹽之藪舳舻鱗集私販莫遏非得奉旨紅牌則人不知懼清其流而澄其源私販自可息矣

長蘆鹽法志附編

援證三

歷代場竈

世本夙沙氏煮海鹽

按說文作古者宿沙初煮海為鹽廣韻云古者宿沙初作煮海為鹽說苑云夙沙之民歸神農是又在禹貢之前矣

禹貢海岱惟青州海濱廣斥

說文鹵西方鹹地也東方謂之斥史記夏本紀作海濱廣瀉厥田斥鹵鄭康成曰斥謂地鹹鹵按史記正義云舜分青州為營州遼西及遼東管子所謂燕有遼東之煮是也

周禮地官職方氏幽州其利魚鹽

國語齊通魚鹽於東萊

史記齊世家太公至國修政因其俗簡其禮通工商之業便魚鹽之利而人民多歸齊按左傳齊北至無棣服虔謂是太公始受封土地疆域所

至元和郡縣志無棣溝在慶雲縣又史記燕世家齊桓公伐山戎還燕君送出境桓公因割燕君所至地予燕其說與說苑同括地志云燕留故城在滄州長蘆縣東北十七里即齊桓公割地予燕之處則滄州故齊境也漢書地理志齊地北有千乘清和以南勃海之高樂高城重合陽信故地今皆隸直隸布政司故長蘆鹽法得載齊事非藉也

史記燕有魚鹽棗栗之饒

管子戒篇山林梁澤以時禁發而不正也草封澤鹽者之

歸之也譬若市人房元齡注草封澤謂澤多草刈積成封若市人言不設禁也可用煮鹽者也其處既多鹽故歸者譬

管子地數篇夫楚有汝漢之金齊有渠展之鹽燕有遼東

之煮此三者亦可以當武王之數十口之家十人啗鹽百

口之家百人啗鹽凡食鹽之數一月丈夫五升少半婦人

三升少半嬰兒二升少半鹽之重升加分耗百釜五十升

加一耗百釜百升加十耗百釜千君伐道薪煮泔水為鹽

正而積之三萬鹽至陽春請籍之於時桓公曰何謂籍於

時管子曰陽春農事方作令民毋得築垣牆毋得繕冢墓

大夫毋得治宮室毋得立臺榭北海之眾毋得聚庸而煮

鹽然鹽之賈必四什倍君以四什之賈修河濟之流南輸

趙梁宋衛濮惡食無鹽則腫守圉之本其用鹽獨重君伐
道薪煮涕水以籍於天下然則天下不減矣

管子輕重甲篇管子曰陰王之國有三而齊與在焉桓公
曰此數言可得聞乎管子對曰楚有汝漢之黃金而齊有
渠展之鹽燕有遼東之煮此陰王之國也今齊有渠展之
鹽請君伐道薪煮涕水為鹽正而積之桓公曰諾十月始
正至於正月成鹽三萬六千鍾召管子而問曰安用此鹽
而可管子對曰孟春既至農事且起大夫毋得繕冢墓理
宮室立臺榭築牆垣北海之衆毋得聚庸而煮鹽若此則

鹽必坐長百十倍桓公曰善行事奈何管子對曰請以令

糶之梁趙宋衛濮陽彼盡饋食之也國無鹽則腫守圉之

國用鹽獨甚桓公曰諾乃以令使糶之得成金萬一千餘

餉房元齡注曰渠展齊地涕水所流入海之處可煮鹽之
所也正音征庸功也北海之衆謂北海煮鹽之人本意
禁人煮鹽託以農事慮有妨奪

管子輕重丁篇隰朋馳而北反報曰北方之萌者衍處負

海煮涕為鹽梁濟取魚之萌也

史記平準書大農上鹽鐵丞孔僅咸陽言山海天地之藏

也皆宜屬少府陛下不私以屬大農佐賦願募民自給費

因官器作者鹽與牢盆浮食奇民欲擅管山海之貨以致富羨役利細民其沮事之議不可勝聽

宋史食貨志鬻海為鹽曰京東河北兩浙淮南福建廣南凡六路其鬻鹽之地曰亭場民曰亭戶或謂之竈戶戶有鹽丁

玉海呂成公曰洪範五行一曰水水曰潤下作鹹此鹽之根原品目甚多如青州出東井幽薊北海嶺南海皆出於海河北鹵地出於地者

元典章鑄盤織席之家運司常加照管毋令有司拖挈騷

擾違者究問○諸場鹽袋皆判官監製須要勦重均平無有餘欠運使以下分轉檢校仍於袋上書寫監製檢校職位姓名以千文為號如法編垛凡遇商客支請驗其先後從上給付○諸場煎鹽柴地舊來官為分撥初非竈戶已業故宋時禁治豪民不許典賣亦不許人租佃開耕今知各場富上竈戶往往多餘冒占貧窮之人內多買柴煎鹽私相典賣開耕租佃一切無禁今後運司嚴加禁治更為差官體究若有此情弊即仰依理歸著無柴去處從公分撥務要貧富有柴煎鹽不得似前違錯

本草圖經煮鹽之器漢謂之牢盆今或鼓鐵為之或編竹為之上下周以蜃灰廣丈深尺置於竈皆謂之鹽盤續文獻通考世祖舊制鹽亭竈戶三年一比附推排任事者恐斂怨久不舉行王都中請於行省遍歷二十四場驗其物力高下以損益之役亦平而課亦足公私便之元史賈魯本傳至治元年河水北侵安山淪入運河延袤濟南河間將隳兩漕司鹽場丞相以其事屬魯

長蘆鹽法志附編

援證四

歷代轉運

陳傅良鹽法論宋雍熙二年三月令河東北商人如要折博茶鹽令所在納銀至京請領交引

長編天聖八年馬季良建言京師賈人常以賤賈居鹽茶交引請官置務收市之鹽鐵副使王巖持不可曰與民競利豈國體耶他日上見巖勞之曰官市交引賴卿力言罷之甚善有司臨事當如是也

宋史食貨志宣和三年大改鹽法舊稅鹽並易為鈔鹽凡未賣稅鹽鈔引及已請算或到倉已投暨未投者並赴權貨務改給新法鈔引許通販已請舊法稅鹽貨賣者自陳更買新鈔帶賣已請鈔引毋得帶支初茶鹽用換鈔對帶之法民旅皆病然河北猶未及也至是並河北京東行之金史食貨志滄寶坻餉三百為袋袋二十有五為大套鈔引公據三者俱備然後聽鬻小套袋十或五或一每套鈔一引如袋之數皆套一鈔石一引零鹽積十石亦一鈔而十引其行鹽之界各視其地宜山東滄州之場九行山東

河北大名河南南京歸德諸府路及許亳陳蔡潁宿泗曹睢鈞單壽諸州○泗州壽州亳州行山東滄州場鹽○貞元初蔡松年為戶部尚書始復鈔引法設官置庫以造鈔引鈔合鹽司簿之符引會司縣批繳之數七年一釐革之○寶坻零鹽較其餉數或六之三或六之一又為小鈔引給之

舊志元蒙古太宗庚寅年始立鹽法每鹽一引重四百餉

按庚寅蒙古太宗二年閏四十二年至世祖至元八年始建國號元

元史本紀至元二十一年十二月立常平鹽局○至元三

十三年十月尚書省臣言。南北鹽均以四百觔為引。今權豪家多取至七百觔。莫若先貯鹽於庫。來則授之。為便從之。

元史食貨志。大德八年。以竈戶艱辛。遣官究議。停煎五萬餘引。天歷二年。額辦正餘鹽九十五萬七千五百引。

舊志。大德十年。詔各道禁沮擾鹽法。增河間山東兩浙兩淮福建廣海鹽運司歲煮鹽二十五萬餘引。

元史食貨志。凡偽造鹽引者。皆斬籍其家產。付告人充賞。元典章官鹽引。用運司印信關防。隨時倒給。勘合開寫引。

鈔字號行下合屬。照依鹽法觔重。挨次查鹽。查訖鹽袋。於引背上分明大字批寫。某客於某年月日。某場查鹽出場。比對勘合抄寫字號相同。將引給付客旅。其鹽客對鹽場官。一一點檢字號年月。批鑿印信俱備。隨鹽於行鹽地方。從便興販。販鹽客旅。賣過鹽袋。退引限五日。赴所在官繳納。如違限匿而不批納者。同私鹽法。

明史食貨志。洪武時。長蘆歲辦大引鹽六萬三千一百餘

引。

舊志云。六萬三千一百五十。三引三百觔零。每引四百觔。

宏治時。改辦小引鹽十八

萬八百餘引。

舊志云。每引二百觔。共一十八萬八千七百八十八觔零。

萬歷時。同鹽

行北直隸河南之彰德衛輝二府所輸邊宣府大同薊州舊志明初分商之綱領者五曰浙直之綱曰宣大之綱曰澤潞之綱曰平陽之綱曰蒲州之綱分商之名目者四曰在邊報中之商曰在場買鹽之商曰在司守支之商曰行鹽地方賣鹽之商中鹽之邊鎮三曰宣府鎮每年中七萬五千五百二十五引八十六觔曰大同鎮每年中三萬七千三百七十六引五十觔曰薊州鎮每年中六萬七千九百六引一百五十觔以上共大引九萬四百四引四十觔十四兩每一大引折四小引共折一十八萬八百八引八

十九觔十二兩八錢

古今釐畧明洪武二十六年定興販鹽貨各照行鹽地方發賣不許變亂合用引目各運司申報戶部委官關領本部將來文立案委官於內府印造候畢日將造就引目呈堂領回部督匠編號用印齊備明立文案給付差來官收領回還取領狀入卷備照其各處有司凡有軍民各商中賣官鹽賣畢隨即將退引赴住買官司依例繳納有司類解各運司按季通類解部本部塗抹不用凡遇開中鹽糧務要量彼處米價貴賤及道路遠近險易明白定奪則例

立案具奏出榜給發各司府州並淮浙等運司張挂召商中納

明會典洪武間戶部茶鹽引印及鹽糧勘合並茶鹽引由契木銅版俱收貯內府戶科編號木記收貯戶部凡遇各處急缺糧草則戶部奏請印刷編定召商開中正統十一年改為南京戶部鑄換印與銅版各增南京二字於戶部之上仍收貯南京內府戶科遇開中本部差官至彼印刷編定齋赴開中處所給發其印及銅版木記用使年久平乏模糊則奏請改鑄刊造○戶部鹽引之印篆文一顆

明史食貨志正統時以商人守支年久雖減輕開中少有上納者議准浙長蘆以十分為率八分給守支商曰常股二分收貯於官曰存積常股存積之名由此始凡中常股者價輕中存積者價重人甚苦守支爭趨存積而常股壅矣○正統三年寧夏總兵官史昭奏請納馬中鹽上馬一匹與鹽百引次馬八十引既而納銀於官以市馬銀入布政司銀盡而馬不至而邊儲亦自此告匱於是召商中淮浙長蘆鹽以納之

明會典正統三年令各運司給客商引目每引納中夾紙

一張至關引之時彙解戶部倒引

舊志正統五年議準長蘆鹽課量場分遠近著為則凡四等召商中賣高下互為搭配其遠年不敷者又從而立之法俾於納剩餘鹽自相糶糴○定常股存積分數以天下鹽八分為常股聽商支二分為存積備客兵不時之需凡引常股價輕存積價重常股須挨次行支存積則不分次第引到即支長蘆分派常股鹽一十二萬六千五百六十五引一百八十觔三兩三錢存積鹽五萬四千二百四十二引一百五觔一十二兩八錢

明會典景泰元年令商人支鹽賣畢截角退引過期不繳者行各處巡鹽御史按察司查題三年奏準運使收到客商退引按季彙解俱開客商某於某年月日支出官鹽若干發賣某行鹽地方及某月日繳到及已繳若干未繳若干其有沈匿在庫通同庫役人等轉賣影射私鹽者照私鹽榜例問罪

續文獻通考客商派定場分守支清即打引出場若無見鹽者止許於本場買補若將已支鹽課捏作未支遺留空引侵盜影射私鹽者鹽貨價錢入官官吏縱容以枉法論

明會典宏治二年定各處掣過引鹽出給水程坐於行鹽地方發賣畢將引目徑赴所在官司告繳運司提舉司每一年一次造冊備開各商貫址並違限月日送部轉發該管司府衛所提問責限追銷

明實錄宏治十八年吏部主事楊子器清理鹽法戶部官總計天下鹽課驗出入之多寡定伸縮之節目凡商人中買鹽引勘合務支與本色領引支鹽不許攬越及行鹽地方尤須隨時平賣命所司看詳以聞

明史食貨志武宗初鹽法日壞慶寧侯周壽壽寧侯張鶴齡令各家人奏買長蘆兩淮鹽引大監崔杲又奏乞長蘆鹽二萬引權要開中既多又許買餘鹽一引有用至十餘年者正德二年始申截舊引角之令立限追繳

舊志正德八年巡鹽御史徐讚奏言舊制商人從運司照引到場次及掣所每引遞截三角至行鹽地方並去一角此天下通行關防影射奈何監掣匪人與分司官同分常例開引有錢直與發賣人通為一家老引隨身不知影射賣過私鹽幾千請令巡鹽御史四季大掣或不時秤掣先令運司將應掣商人姓名引數開造手冊一本送院鈐記

封發承委官員。照數驗引掣畢。將冊封交行鹽地方。待人鹽至日收引。即便截角。先繳運司。另置小票。就於發去冊內。商人各姓名上。照引用印掛號。人給一張。限日行賣。嚴飭牙行。依期銷票。完日將冊繳報察院。如監掣委官受賄。不行關防。致令夾帶私鹽。並行鹽地方官員。勒指商人開引錢物。事發並以贓論。

續文獻通考。明正德十四年。令各運司。今後割沒餘鹽。不拘多寡。俱令本商。照依時估。納銀中賣。量加火耗。以資解路費。若本商乘機夾帶。賄通官吏。不行盡數掣割者。盤鹽

入官。官吏坐以枉法贓罪。○嘉靖七年為始。各邊中正鹽一引。到於運司。令添中餘鹽二引。先納引紙價銀六釐。行南京戶部。添刷引目二道。給與商人。正鹽照舊派場關支。添中二引。聽各商自行買補。過所如法稱掣。

明會典。嘉靖十三年。戶科都給事中管懷理奏言。每正鹽一引。定價五錢。或四錢。餘鹽一引。或二錢五分。或二錢不等。必解赴太倉。俱令開邊中納。正鹽給以引目。下場餘鹽。給以小票。商自收買。每正鹽一引。許中餘鹽三四引。以盡收為度。未盡則倍加引目。

舊志嘉靖十四年給事中管懷理題請每引止準鹽四百三十觔內二百五十觔為正鹽包索其餘鹽二百二十五觔○嘉靖十七年御史陳讓題準仍加包索二十觔共四百五十觔○嘉靖三十年御史陳善治題準每引除四百五十觔外再加餘鹽一百五十觔包索十五觔通共六百五十觔○嘉靖三十七年給事中趙鏘題準正鹽一引二百五十五觔外加六十觔其赴邊勞苦連包索二十觔共三百三十觔許帶餘鹽二百六十五觔為一包共五百九十五觔○嘉靖四十四年御史李文績題準增包索十觔南

所納銀三錢九分七釐五毫北所納銀四錢三分七釐二毫五絲此外多帶二十觔以上納銀一錢再多則問罪有差

明實錄隆慶二年南京戶科給事中張應治言各運司引目預刷待領則庫房狹隘恐致泥爛臨時方給則輻輳並至不免稽留宜將各運司引目酌量分為四起先兩淮次兩浙次長蘆山東河南次福建廣東四川先期半年移文該部知會行應天府置紙委官印造每十引為一封收貯後鈔庫以次給領如印匠不敷量增工役給以口糧事畢

則已報可。

舊志萬歷十七年開封府二十三州縣改食長蘆大引鹽三萬九千四十三引。增課三萬二百三十九兩六錢零。○萬歷三十四年部議於見行歲額內每引帶鹽十觔徵銀四分充寧夏兵餉。未幾商人稱帶鹽賠累止徵二分每引共六百五十觔。遂循之不變。○天啟元年增開封二萬引。增正順彰輝等府三萬引。○崇禎三年戶部議覆御史喻思恂疏山東原增遼餉六萬引。先經鹽臣帥衆題革。而以新引之鹽攤加舊引包內。每包加鹽二百四十觔。即以新

加之課加於舊引課內。今該運司以病商虧課為言。欲推行於長蘆。已經詳議認行。計蘆鹽只行四萬四千引。合引價餘鹽可抵六萬引數。○總督傅宗龍請增密雲一千引。通州一百引。增課七百八十八兩二錢五分。○明季長蘆額鹽二十三萬九千八百五十引。○明制長蘆引目。每年五月運司詳院委場官一員。商人一名。赴南京戶部關引。戶部印畢。每十引為一封。交官領回。運司驗發。



